

CBETA電子佛典集成

CBETA Chinese Electronic Tripitaka Collection
ebook

X73n1454

雲谷和尚語錄

(參學)宗敬·道傑·惟能·
宗會·祖祿 編

中華電子佛典協會



目次

- [編輯說明](#)
- [章節目次](#)
 - [雲谷和尚語錄目次](#)
 - [雲谷和尚初住平江府聖壽禪寺語錄](#)
 - [嘉興府本覺禪寺語錄](#)
 - [建寧府開元禪寺語錄](#)
 - [平江府虎丘山雲岩禪寺語錄](#)
 - [小參](#)
 - [告香普說](#)
 - [秉拂](#)
 - [偈頌](#)
 - [血書蓮經](#)
 - [天衣悟道并](#)
 - [南叟號](#)
 - [寄呈靈隱石谿和尚](#)
 - [枯體擔人我檐](#)
 - [悼双杉和尚](#)
 - [石鏡號](#)
 - [不傳號](#)
 - [徑山火後重開大慧語](#)
 - [牧坡號\(蘇省元取牧羊之義\)](#)
 - [送慧居士](#)
 - [送無機小師明兄](#)
 - [贈陳梅坡說史](#)
 - [書華嚴經](#)
 - [讚佛祖](#)
 - [坐岩石大士](#)
 - [魚籃](#)
 - [草衣文殊普](#)
 - [夾山見舡子](#)
 - [香巖聞擊竹](#)
 - [朝陽](#)
 - [對月](#)
 - [寒山\(執掃箒\)](#)

- [拾得\(執經卷\)](#)
- [五祖送六祖渡江](#)
- [缸子](#)
- [巖陽](#)
- [小佛事](#)
 - [直大師起骨歸泉州](#)
 - [延淨頭起骨](#)
 - [義藏主火\(曾在徑山維那\)](#)
 - [永上人鎖龕](#)
 - [導書記入塔](#)
 - [補陀吉西堂奠茶](#)
 - [自明書記火\(暫到死\)](#)
 - [志典座火](#)
 - [空海寶西堂炬](#)
 - [為沙彌落髮付衣](#)
- [跋謙首座書松源師翁普說後](#)
- [No.._1454-A](#)
- [卷目次](#)
 - 1.
 - 2
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

雲谷和尚語錄目次

- 卷上
 - 聖壽禪寺語錄
 - 本覺禪寺語錄
 - 開元禪寺語錄
 - 雲岩禪寺語錄
- 卷下
 - 小參
 - 告香普說
 - 偈讚
 - 小佛事
 - 跋

No. 1454

雲谷和尚語錄卷上

雲谷和尚初住平江府聖壽禪寺語錄

參學 宗敬 編

師於寶祐四年八月入院。指三門云。有拔開力。具透開眼。總未入得聖壽門。新長老今日放行去也。喝。

佛殿。不著佛求。不著法求。用禮作麼。提起坐具云。放過不可。據室。磨竭掩室。毗耶杜詞。拍床云。太湖三萬六千頃。月在波心說向誰。

拈衣。雞足峯守得定。大庾嶺提不起。提法衣云。這個響。以我為隱乎。吾無隱乎爾。

陞座拈香云。此一瓣香。恭為今上皇帝祝延 聖壽。萬歲萬歲萬萬歲遂就座。垂語云。萬頃煙波。四橋風月。千尺[糸*系]綸直下垂。三山大鰲輕一掣。菓有不貪香餌底麼(問答不錄)。

提綱。文彩未彰。蘇州有常州有。絲毫纔露。主山高案山低。一切處不留。一切處成就。紅塵鬧市。放兩拋三。白浪堆中。呈橈舞棹。南垂虹。西合浦。從汝諸人往來。從汝諸人點首。只如保壽開堂。三聖推僧。保壽便打。意在於何。橫按鑊錐行正令。太平寰宇斬癡頑。

晚小參。問答罷乃云。德山小參不答話。奮巨靈分太華之威。趙州小參要答話。展金翅擘滄溟之勢。若是舉一明三。目機銖兩。如磁石見鐵相似。輕輕一引便動。說甚好與三十。說甚拋磚引擊。今夜不動功勳。不觸風化。革轍通途。海行條貫。會麼。太湖跨三州。復舉寶公令人傳語思大。何不下山。教化眾生。目視雲漢作麼。思大云。三世諸佛被我一口吞盡。有甚眾生可化。師拈云。二大老。一人口甜心苦。一人扶著便醉。於唱教門中則故是。若約衲僧門下。直須血滴滴地。卓柱杖一下云。車不橫推。理無曲斷。上堂。入院二十日。波波復挈挈。逢僧深問訊。見俗低相揖。因甚十个有五双。當機蹉過。雖然。禍不入慎家之門。佛涅槃上堂。生滅滅已。寂滅為樂。黃面瞿曇。死了活不得。摩胸告眾。槲示双趺。黃面瞿曇。活了死不得。聖壽有个祕傳方法。死得活底。活得死底。遂拈柱杖。卓一下云。活也活也。諸人還見老瞿曇麼。靠柱杖云。不是不是。謝天台靖首座淨慈王藏主上堂。江南兩浙。春寒秋熱。明明道得不知有。明明知有道不得。良久云。豐干騎底大虫。元是南山白額。上堂。舉僧問風穴。語默涉離微。如何通不犯。風穴云。長憶江南三月裏。鷓鴣啼處百花香。師拈云。黃面浙子。念一道神呪。盡將大地人一禁禁定。直是喘氣不得。聖壽未免誦普回向真言。到江吳地盡。隔岸越山多。刊入方珠玉上堂。靈山正法眼。中峯破沙盆。扶持不起。搖乾蕩坤。喝一喝云。我行荒草裏。你又入深村。上堂。心火炎炎。境風浩浩。顯德山臨濟大機大用。破塵勞眾生七顛八倒。會麼。善賈之家。不停死貨。謝無外首座上堂。一葉落天下秋。恁麼會又爭得。一塵起大地收。不恁麼會又爭得。恁麼不恁麼。鐵壁復鐵壁。雖然。若非明眼人。也大難委悉。謝徑山翔藏主溫州杭侍者上堂。一大藏教。切鉢羅娘。滿口嚼冰霜。親到曹湊。遶床振錫。平地栽荊棘。舉也舉了也。拈也拈了也。會麼。川僧荔苴。浙僧瀟洒。上堂。舉僧問香林。如何是衲衣下事。香林云。臘月火燒山。師拈云。臘月火燒山。言端語亦端。白雲收谷口。明月浸欄干。臘八大雪。徑山偃溪和尚至。上堂。二千年前。二千年後。奇哉奇哉。希有希有。等是出山下山。教化眾生。莫有眼明心悟底麼。如無。聖壽向雪上加霜去也。卓柱杖。下座。元正上堂。今朝正月一。說話多忌諱。若說佛法。又道說佛一字。漱口三日。若說世法。又道祖師門下。不許俗談。拈丈云。柱杖子試露个消息看。卓一下。牛進千頭。馬進百匹。

元宵上堂。天上月圓。人間月半。一灯百千萬億灯。是處光明皆燦爛。忽然霧擁雲興。乾坤黑漆。灯在什麼處。良久云。翻憶香林。證龜成鱉。

上堂。舉。僧問雲門。光明寂照遍河沙。雲門云。豈不是張拙秀才語。僧云。是。雲門云。話墮也。師拈云。石火機前。電光影裏。擬欲追蹤。千里萬里。雖然如是。那裏是這僧話墮處。良久云。路不拾遺。君子稱美。

上堂。春日遲遲。春色依依。見桃花更不疑。聞擊竹忘所知。因甚一人道未會。一人道未徹。良久云。大冶精金。應無變色。

覽徑山佛海語上堂。靈山單傳。少林直指。始從昇元閣。終至凌霄峯。於是二中間。總未曾說著。諸人還知佛海落處麼。文彩已彰。謝藏主副寺上堂。一大藏教。當甚橫頭日黃薄。這些說話。非瞌睡虎。不能詮釋。非賣生姜漢。不能顯示。其餘道得。黑豆好合醬。白米好做飯。聖壽未肯點頭。何故。家住西州。

結夏上堂。拈拄杖卓一下。向這裏領略得去。靈山一會。儼然未散。儻或不然。且聽拄杖子說安居偈。卓一下云。太文彩生。

上堂。百丈遭馬祖喝。臨濟喫黃栢棒。刺腦膠盆。投身憲網。只如這邊那邊。三百五百。浩浩商量。皮下還有血麼。卓拄杖一下云。鐵鞭多力恨無讎。

上堂。衲僧家。具行脚眼目。顯向上巴鼻。提金剛槌。碎聖凡窠臼。秉智慧劍。斷佛祖命根。一大藏經卷。是拭瘡疣破故紙。千七百傳灯。乃弄獼猴閑家具。喝一喝。未必善因而招惡果。

上堂。達磨面壁。雲門念七。旱地轟雷。炎天赫日。古人恁麼。聖壽不恁麼。一棒一條痕。一擱一掌血。必意如何。六月不熱。五穀不結。

解制上堂。萬里無寸草。出門便是草。俊鶻稍空。猛虎當道。拍床云。明眼衲僧看不破。

中秋雨上堂。兩暗平湖。雲籠青嶂。不知心月孤圓。往往貪觀天上。諸人還猛省麼。正好修行。正好供養。

重建圓照堂并方丈上堂。深一丈。闊一丈。佛祖揩摸。古今榜樣。只如圓照堂。夜來與三高堂鬪額。是第幾機。良久云。眾眼難瞞。開爐上堂。對聖僧坐禪。與泥像說法。二千年前宿火。已是深深撥開。諸人還覺通身汗下麼。不然。放待冷來著。

嘉興府本覺禪寺語錄

參學 道傑 編

踞室。橫按柱杖云。正令全提。鐵壁鐵壁。卓柱杖一下云。百丈耳聾。黃蘗吐舌。

拈帖。正法眼藏。靈山付囑。正在今日。如何是今日事。帖是嘉興府出。

上堂。盡力道不得底句。三過堂說了也。一擊軒說了也。有底聞恁麼道。咬斷拇指。有底聞恁麼道。皺却雙眉。雖然如是。一得一失。

上堂。謝龍安和尚。兼周檢閱。大明西堂。興聖首座侍者。曾參一唯。迦葉一笑。燎原之禍。起於一燧。至於擔睦州板。提破沙盆。盡是潑油救火。其焰益張。喝一喝云。白日青天。有恁麼事。淨慈介石和尚遺書至。上堂。無常生死法。突兀南山倚天末。於我不相干。瀲灩西湖浸月寒。更說珍重偈。八九分明七十二。虛空成兩邊。少處咸兮多處添。个是介石老人。錯供死款。壽山今日。盡底活翻。會麼。若教頻下淚。滄海也須乾。

謝藏主上堂。舉。僧問五祖和尚。一大藏教。是个切脚。未審切什麼字。五祖云。鉢囉娘。頌云。一句全提梵字經。舌顯當滴帝都丁。不知將謂平平仄。到了元來仄仄平。

上堂。是句也割。非句也割。逼得雄雞生鵠卵。恁麼也得。不恁麼也得。放下死蛇拈活蝎。本覓與麼道。意在於何。開山靜慧師。親見龍牙老。

上堂。舉。應菴和尚問密菴和尚。如何是正法眼。密菴云。破沙盆。師拈云。密菴老人。向大徹堂前。轉唯觸諱。直得正宗掃土。諸人還知麼。劫石易消。鄉談難改。

佛海忌日。拈香云。趁風於太白峯前。[搨-日+厶]人左語。再參於靈山會上。貫耳大雷。從茲恨氣蟠胸。也要辱他門戶。老和尚。我不重汝解粘。只重汝添縛。不肯汝全収。只肯汝全放。慙慙爇此兜樓。是名真法供養。

元旦上堂。今朝欲說新年頭佛法。已被鏡清說了也。欲說不遷底句。又被法昌說了也。未免只據現定說與諸人。卓柱杖一下云。三段不同。收歸上科。

謝臨安林提幹徑山應侍者萬壽堅侍者靈隱俊藏主上堂。淨名一默。國師三呼。雲收碧漢。雷轟太虛。只如一大藏教。還有這個消息也無。咄。長安城裏。休問皇都。

開爐上堂。冷冰冰地一解。六年雪嶺。九載嵩山。不得一半。山僧擬欲行之。盡法無民。且與麼。和光同塵。火家煖熱。良久云。火爐闊何似古鏡闊。

上堂。舉。藥山坐次。僧問。兀兀地思量个什麼。山云。思量个不思量底。僧云。不思量底。如何思量。山云。非思量。頌云。輪囷

古木倚寒林。雪壓霜埋春信深。忽地好風輕撼勤。細聽渾是者龍吟。

啟建聖節上堂。一句無私。當陽顯露。電繞星樞。虹流華渚。直得普天亞地。有情無情。悉皆鼓舞。何故。聖人作而萬物覩。

謝法華希叟和尚。源別澗首座。上堂。舉。瑯琊覺因法華舉相訪。遂問。近離甚處。舉曰。兩淞。船來陸來。曰船來。船在甚麼處。曰步下。不涉程途一句。作麼生道。舉以座具撼一撼曰。杜撰長者。如麻似粟。便拂袖而出。瑯琊問侍者。此是甚麼人。曰舉上座。瑯琊遂親下且過堂。問莫是舉上座麼。莫恠適來相觸忤。舉便喝。復問。長老何時到汾陽。曰某時到。舉曰。我在淞江。早聞你名。元來見解只如此。何得名播寰宇。瑯琊遂作禮曰。慧覺罪過。師拈云。一人如龍戲滄溟。四海水立。一人如虎踞巖麓。萬籟風生。全主全賓。全生全殺。古人則且致。即今主賓相見。又且如何。嚶。知是般事便休。

上堂。信口道句句朝宗。信手用機機相副。只如臨濟縮劫舌頭。德山閣起柱杖。向甚處相見。良久云。下座。巡堂喫茶。

上堂。豎起拂子云。向者裏見得。一塵飛而翳天。一芥墮而覆地。其或未然。拂子穿燈籠入露柱。向蟪蛄眼裏。開張世界去也。擲下拂子。

上堂。舉。高亭初參德山。隔江問訊。德山以手招之。高亭橫趨而去。更不回顧。後法嗣德山。大慧拈云。高亭橫趨而去。許伊是靈利衲僧。若要法嗣德山則未可。何故。與德山猶隔江在。癡絕和尚云。德山有含沙射人之毒。高亭一死更不再活。師拈云。德山有運斤之手。高亭有受斤之質。當時更得澧州魚羹爛糲一頓。門風未到寂寞。只如大慧和尚癡絕老人與麼道。是褒是貶。疾風知勁草。版蕩識良臣。

結夏上堂。百二十日長期。今朝是第一日。諸人寬作程浪。急作手脚。驀然知得眼在眉下。鼻在唇上。只許你知。不許你見。要見麼。以手摸鼻云。何似生。

謝秉拂夏齋上堂。一句子百味具足。都寺拈出了也。一句子淡乎無味。首座拈出了也。使我一眾。飢虐頓除。聞見俱泯。山僧亦有一味。只是辛辣。也要諸人吞吐。卓拄杖云。今日供養。何似昨日。

上堂。僧問馬大師。離四句。絕百非。請師直指西來意。祖云。我今日勞倦。不能為汝說得。問取智藏。智藏云。我今日頭痛。不能為汝說得。問取海兄。海兄云。我到者裏却不會。僧舉似馬祖。祖云。藏頭白海頭黑。師拈云。興於詩。立於禮。成於樂。則故是。還知直指為人處麼。良久云。民可使由之。不可使知之。

上堂。舉。僧問洞山。寒暑到來。如何回避。山云。何不向無寒暑處回避。僧云。如何是無寒暑處。山云。寒時寒殺闍梨。熱時熱殺闍梨。頌云。一曲新豐雪子吟。雲籠古殿夜沉沉。普天匝地無回互。莫把商音作羽音。

保苗上堂。舉。南嶽讓和尚。與馬大師說。汝學心地法門。如下種子。我說法要。譬彼天澤。汝緣合故。乃見其道。師云。這般說話。只是尋常日用事。驅為山牛。耕雲擺月。荷麻谷鋤。淺種深耕。去無明草。滋養靈苗。喚作汝學心地法門。如下種子得麼。密布慈雲。遍洒甘露。高懸慧日。別振玄風。喚作我說法要。譬彼天澤得麼。五穀豐登。萬寶秀實。渾家一飽。頓忘百飢。喚作汝緣合故。乃見其道得麼。拍禪床一下云。笑倒金州和尚。

謝蘇新恩程宣教昇侍者上堂。迦葉笑中旨。伏羲畫外傳。蛟龍得雲雨。鷓鴣在秋天。

出城歸謝故舊上堂。十字街頭。回頭轉腦。只為等个人來。村草步頭。捏住鼻端。野鴨何曾飛去。恁麼見得。傾盖如故。其或未然。西秦東魯。

解夏上坐。十五日巳前。住住無所住。十五日巳後。去去無所去。正當十五日。也不去也不住。本覺堂中解夏齋。那蘭寺裏托鉢舞。佛海禪師忌日上堂。庭柯一葉飄。大地皆秋色。堪嘆參玄人。幾個知時節。拍膝云。趙州當日見南泉。解道鎮州出蘿蔔。

上堂。舉。僧問雲門。樹凋葉落時如何。雲門云。體露金風。師拈云。應時如風。應機如電。則不無雲門老人。仔細看來。太煞傷筋動骨。

謝大機首座上堂。顯大機。彰大用。破的破塵。百發百中。起萬年正續。滅東山正統。證其所竊之羊。元在長廊蜂桶。

九月旦上堂。舉。慈明謝故舊頌云。颯颯涼風景。同人訪寂寥。煮茶山水下。燒鼎洞中樵。慈明者人富而不驕。約而不儉。雖然。未免費用常住。本覺則不然。颯颯涼風景。同人訪寂寥。砒霜和狼毒。白飯糝美椒。且道與古人是同是別。

重九上堂。金風淅淅。玉露瀼瀼。紫更施紫。黃菊施黃。王孫公子。在在處處登高吟賞。林下道人。三三兩兩聚頭商量。且道商量底是什麼事。九月九日是重陽。

上堂。舉。三角示眾云。若論此事。眨上眉毛。早是蹉過。麻谷出眾云。蹉過即不問。如何是此事。三角云。蹉過。麻谷掀倒禪床。三角便打。雪竇拈云。兩個有頭無尾漢。眉毛未曾眨上。說什麼蹉過。僧便問。眉毛因甚不眨超。雪竇便打。師拈云。二大老。一人向石火機前垂手。一人向電光影裏挨肩。全放全收。全生全殺。雪竇因甚道。兩個有頭無尾漢。具眼者辨取。

上堂。釋迦頂骨。達磨眼睛。在谷蒲谷。在坑蒲坑。拍禪床云。擊碎了也。天平地平。

至節上堂。金烏飛玉兔急。一陽生是今日。拈主丈云。這個羸辣梨。通身黑似漆。還有生長也無。乃提起主丈云。七尺八尺。

上堂。電掣電轟。崖崩石裂。掩耳不及。眨眼不及。千古寥寥知者誰。黃蘗聞之驚吐舌。

佛成道上堂。正覺山前。凍不死餓不死底老和尚。迫到明曇現時。未免自欺自註。咄。禍胎住也。人間天上。

謝明藏主上堂。祖師巴鼻。從上爪牙。會則事同一家。不會則萬別千差。只如經歸藏禪歸海。作麼生會。卞璧無瑕却有瑕。

遶街祈晴上堂。兼謝徑山道場道舊。靜中底。鬧中底。非則總非。是則總是。盤山向肉案頭倒跟。樓子於歌聲中瞥地。是汝諸人。連日遶街行道。莫有同途共轍底麼。啞。龍門無宿客。虎穴却生彪。

上堂。舉。文殊是七佛之師。因甚出女子定不得。罔明有何神通。而出女子定。師云。出得出不得。即且置。還知世尊敗闕處麼。玉印不離天子手。金箱豈可庶人。

建寧府開元禪寺語錄

參學 惟能 宗芳 編

據室。拈拄杖卓云。與麼提持。盡大地人。望風輪疑。靠拄杖云。到則不點。

陞座拈香祝 聖罷。(問答不錄)乃云。諸佛不出世。明歷歷月皎長空。祖師不西來。孤迥迥雲生深谷。直得紫芝峯靈苗秀異。丹青閣溢目光華。非惟七州管內。莫杖無憂。普使盡大地人。太平坐致。雖然如是。必竟功歸何所。良久。千峯朝華嶽。萬派肅滄溟。復舉。建州夢筆和尚。僧問。如何是佛。答云。不註汝。僧云。莫便是否。答云。汝誑也。師頌云。一句全提不誑汝。擬披襟處自欺瞞。多看月色和雲白。不覺泉聲帶露寒。

中秋上堂。僧出問云。今朝八月十五。正是月圓當戶。雖然匝地普天。要且絲毫不露。師云。坐在覆盆之下。又爭怪得。進云。露柱放光明。燈籠齊起舞。師云。且莫服花。進云。對境憑誰話此心。令人長憶寒山子。師云。寒山子道什麼。進云。記得昔日有院主。問馬大師。近日尊位如何。大師云。日面佛月面佛。師云。和尚吐出。進云。日面月面。突出難辨。明眼宗師。一見便見。師云。腦後見腮。莫與往來。進云。且道見後如何。師云。日面佛月面佛。進云。西風一陣來。落葉兩三片。師云。怎麼要見馬大師。三生六

十劫。進云。心月孤圓。光吞萬像。光非照境。境亦非存。光境俱忘。復是何物。師云。描不成畫不就。進云。莫是月印長空。江河流影麼。師云。正是光影裏行。進云。靈山話曹溪指。何曾識得自家底。師云。月響。進云。擬心便被黑雲遮。認著依前還不是。師云。爍破髑髏猶未覺。進云。不認著不擬議。是個什麼。師云。禮拜著。

師舉。寒山云。吾心似秋月。碧潭光皎潔。無物堪比倫。教我如何說。拈云。既說不得。就模子脫出一個。吾心秋月印中天。到處相逢到處圓。普請且歸林下坐。好看光影未生前。

謝首座并空谷和尚上堂。托鉢據南泉位。誰是主誰是賓。長老甚年行道。智過禽獲得禽。威音已前猶是王老師兒孫。老鼠孔裏頭出頭沒。有甚共語處。若欲發明大智門風。須是耳聾三日始得。喝一喝云。却將舊斬樓蘭劍。換得黃牛教子孫。

騰八上堂。四九三十六。夜眠如露宿。瞿曇冷地被星瞞。剛道一切眾生。智慧德相具足。咄。開眼說夢。

謝南劍光孝北山和尚上堂。舉。長慶云。路逢道伴交肩。一生參學事畢。師拈云。芝山與南山。三十年道伴。東西兩浙。南北山中。幾回聚首。幾度交肩。只不曾說著參學二字。何故。彼此識羞。浴佛上堂。身口意清淨。是名佛出世。滿面埃塵。身口意不清淨。是名佛滅度。通身泥水。於此明得。恩無重報。其或未然。竭建溪水轉洗不清。何故。水不洗水。

上堂。舉。長沙和尚游山回。首座問云。甚處去來。沙云。游山來。首座云。到甚處。長沙云。始隨芳草去。又逐落花回。首座云。大似春意。長沙云。也勝秋露滴芙蓉。頌云。一步纔行一步隨。等閑身在武陵溪。洞中無限春消息。自是時人去路迷。

謝靈峯石平首座不赴龍光請。上堂。舉。三聖問雪峯。透網金鱗。以何為食。(云云)拈云。龍門萬仞。透底須是其人。象骨千層。到頂還他作者。古人且置。今日新龍光與芝峯相見。合談何事。良久云。去路一身輕似葉。高名千古重如山。

中夏上堂。一年過半。一夏過半。丹青閣。東行西行。長連床。喫粥喫飯。盡道現成公案。無事不辦。我且問你。因甚達磨來梁。摩騰入漢。參。

上堂。說心說性。舉古舉今。墮在葛藤窠裏。機前領旨。意外明宗。亦墮在葛藤窠裏。畢竟如何免得。擲下柱杖云。切忌。

上堂。向上機。險崖句。三條椽下。默默提撕。十字街頭。堂堂顯露。喝一喝。俊鷹不打死兔。

上堂。舉。黃檗問百丈和尚。從上宗師。如何指示於人。百丈據坐。黃檗云。後代兒孫。作麼生傳授。百丈云。我將謂你是個漢。

便歸方丈。師拈云。嘗聞百丈家法森嚴。門庭高峻。因甚黃蘗輕輕一拶。便見堂奧俱開。雖然。今古有誰親到來。

解夏上堂。禁足安居。按牛頭喫草。尅期取證。打草要驚蛇。若是眼裏有筋。皮下有血。箕未風而巢覺。畢未雨而穴知。諸方浩浩地。踏步向前。討什麼碗。

上堂。風蕭蕭雨蕭蕭。機機相副。物物全超。恁麼會去。八月二十五。其或未然。飴袋子。

開爐上堂。今日開爐。有一則語。火筋香匙。渾是鐵做。

上堂。默時說。說時默。鍊壁重重。銀山疊疊。雪峰九到。人作無門。臨濟三回。痛打不徹。何故。只為分明極。

浴佛上堂。乳兒生下便乖宗。半是真誠半脫空。今日不行韶石令。大家辱水潑頑銅。

辭眾上堂。南閩山。西浙水。高無極。深無底。入則个个歸源。出則無無不是。一輪明月杖頭挑。四海五湖皇化裏。

平江府虎丘山雲岩禪寺語錄

侍者 祖祿 道傑 編

入寺。指三門云。出城見塔。入寺登山。正是門外句。如何是門內句。踏著不嗔。

據室。這裏是吾父翁。烹佛煉祖。煨聖鎔凡底大爐鞴。山僧今日盡底掀翻。只要諸人望風瞥地。拍床一下。

拈省筍。當陽一筍。吹毛出匣。吳越令行。風清六合。

山門疏。句句無私。頭頭合轍。洞裏桃花。屋頭春色。

陞座拈香。祝聖罷。次拈香云。根塵迥脫。枝葉全無。颺在壁巴邊。無人秋采著。被个碎破砂盆。披白雲衣。吵吵鬧鬧。公是公非底。者和尚一覷覷破。今日爇向爐中。也要辱他則个。遂就座。問答提綱罷。復舉。保壽開堂。三聖推出一僧。保壽便打。三聖道。恁麼為人。非但瞎却這僧眼。瞎却鎮州一城人眼去在。保壽擲下主丈歸方丈。師云。石火光中。排兵列陣。擬陷英雄。電光影裏。奪鼓攙旗。功高汗馬。只如擲下主丈歸方丈。又作麼生。輪王三寸鐵。遍界是刀鎗。

小參。(問答不錄)乃云。揚岐的旨。東山暗號。識不可識。智莫能知。二千里閩山浙水。三十日涉險凌波。處處全真。頭頭顯露。及到雨花亭前。頑石點苴。轆轤聲裏。睡虎擡眸。累我祖父。千方百計。設陷藏機。總未構[泳-永+旱]一半。山僧既入其穴。據其頭収其尾。倒捋其鬚去也。拍禪床云。吽吽。

復舉。五祖和尚云。老僧遊方數十年。參數人善知識。將謂百了千當。及到圓鑑會下。直是開口不得。末後到白雲和尚處。因咬破一个鐵餛飩。直得百味具足。且道餛飩子一句。作麼生道。花發鷄冠媚早秋。誰人能染紫絲頭。有時風動頻相倚。似向堦前聞不休。師云。餛飩子一句。渾崙咽却。早是惡心。何況細嚼了。吐與人。雖然川僧薺苴。也輕他不得。

佛涅槃上堂。諸人要見紫磨金色之軀麼。以手指空云。蒼天蒼天。復摩胸云。冤苦冤苦。令人恨氣填胸。年年二月十五。

三月旦上堂。舉。三角和尚上堂云。大凡言語。須是應時應節。有僧出云。四黃四赤時如何。三角云。三月杖頭桃。僧云。為什麼滿肚貯氣。三角云。爭奈一條繩何。僧云。作麼生吐氣去。三角云。須待皮穿。拈云。應時如風。應機如電。則不無三角。這僧似个鼠粘子。被他粘著。無可奈何。山僧當時見他道。四黃四赤時如何。只對他道。霑衣欲溫杏花雨。為什麼滿肚貯氣。吹面不寒楊柳風。如何得出氣去。和聲便打。

上堂。海湧峰高。劔池水碧。須是親到一回。一點瞞他不得。只如三春擾擾。冠盖駢闐。豈不是親到。及乎問著。便道一年一度遊山寺。不上雲岩即虎丘。咄。劔去久矣。爾方刻舟。

浴佛上堂。指天指地。有甚巴鼻。唯吾獨尊。浣盆浣盆。韶陽正見。太阿倒持。藥嶠全機。狐裘返衣。虎丘今日。只要諸人向水不洗水處。為渠湔洗。以拂子作浴佛勢云。攻乎異端。斯害也矣。

開建乾會節上堂。二千年前。靈山會上。金口所宣。仁王護國經一卷。今辰開建乾會節。重為翻譯去也。卓主丈云。下座大佛殿開建。

結夏上堂。九旬禁足之初。三月安居之始。雲岩固守家法。誰敢違條越制。一是一。二是二。事得理融。理由心契。良久。瞎驢不受靈山記。

雲谷和尚語錄卷上

小參

至節朕兆未分。天高地厚。一言道盡。夜暗晝明。所以洞山掇退菓子掉。慈明揭榜僧堂前。用盡自己心。笑破他人口。其餘鬪釘新鮮說黃道黑。檢點將來。一時霉醜了也。聖壽只據見定。和盤托出。一个个相似。要汝諸人。東咬西咬。忽然咬破一个見裏頭仁。方知道一陽生於子。

舉。雲門示眾云。十五日已前即不問。十五日已後。道將一句來。眾無語。雲門代云。日日是好日。拈云。雲門老人。白日青天。顛言倒語。聖壽也有一問。十五日已前即不問。十五日已後道將一句來。即向他道。今朝是十六。

除夜。撲落非它物。縱橫不是塵。山河并大地。全現法王身。只如洞庭七十二峯。高而無上。仰不可及。太湖三萬餘頃。淵而無下。深不可測。喚作法王身得麼。不是目前法。亦非目前事。古往今來。增一絲毫不得。年窮歲盡。減一絲毫亦不得。驀拈主丈卓云。大地山河。向者裏百雜碎。直得鴟夷子與天隨子。手舞足蹈。大顛小怪出來道。奇哉奇哉。我自來有耳。不曾聞與麼說話。有眼。不曾見與麼奇特。靠主丈云。住住。曹谿門下。不許俗談。

舉。黃蘗示眾云。汝等諸人盡是啗酒糟漢。與麼行脚。何處有。今日。還知大唐國裏。無禪師麼。時有僧出眾云。只如諸方。匡徒領眾。又作麼生。黃蘗云。不是無禪。只是無師。拈云。黃蘗老婆心切。為人徹困。誠哉。只是閩人鄉談不改。古今錯會者多。今日下一轉語。不特別其鄉談。要見佛法眼目。良久云。哥勞哥勞。

結夏小參。靈山舊制。震旦新規。置禽於籠。置獸於檻。直須聲色頭上坐。聲色頭上臥。信口道著。舉步踏著。何生可護。何行可修。豈不見汾陽於干戈叢中。六人成大器。妙喜向風波嶮處。打發十三人。聖壽者裏。个个頭頂天。脚踏地。寅朝喫粥。齋時喫飯。咄。何似參退喫茶。

舉。僧問馬大師。如何是祖師西來意。馬大師云。近前來向汝道。僧近前。馬師打一掌云。六耳不同謀。後來黃龍南禪師云。古人尚乃六耳不同謀。而今諸方。三百五百浩浩地。禍事禍事。師拈云。馬駒踏殺天下人。則故是。只如黃龍恁麼道。意在於何。良久云。曾經巴峽猿啼處。未到三聲已斷腸。

解夏小參。太湖浸月。釋迦老子。眼睛打失不知。長橋則波。達磨大師。舌頭爛却不識。既不知又不識。得人憎是這些兒。亘古亘今無變易。諸方尅期取證。固守蠟人。正是繫縛盲驢。斷送未劫。山

僧一夏。保疆守界。只恁麼過。諸人一夏。安時處順。也只恁麼過。雖然如是。必竟所成者。是什麼事。良久云。前三三。後三三。

舉。僧問風穴和尚。九夏賞勞。請師言薦。穴云。一把香葛拈未暇。六環金錫響搖空。師拈云。買鐵得金。風流千載。何故。重賞之下。

冬至小參。空劫已前。空劫已後。有一句子。十分成現。從上以來。未有一人蹉口道著。正眼覷著。本覺今夜。向陰極陽生處。盡情裂破。以拂子擊禪床云。靈光已兆。萬彙含虛空。一氣潛通。花開世界起。恁麼會去。仲冬嚴寒。不恁麼會去。季冬極寒。

舉。僧問香巖。直截根源佛所印。香巖乃拋下主丈。空手而去。師拈云。香巖當陽顯示。不負來機。若是據令而行。莫道者僧。釋迦老子。也無回避處。

除夜小參。諸佛不出世。松自直棘自曲。祖師不西來。烏必玄鵠必白。無端六年雪嶺。九載嵩山。頭上青灰。口邊白醜。作法於涼。其弊猶貪。至於孤村漏店。帶水挖泥。鬧市人叢。欄街截巷。作法於貪。弊將若何。忽有个漢出來道。長老長老。只管論量古人。有甚了期。正當臘月三十日。各人衣單下。有一件大事。又作麼生。但向他道。東風漸解簷前凍。一歲嚴凝又且休。

舉。僧問趙州。萬法歸一。一歸何所。州云。我在青州。作一領布衫。重七斤。師拈云。趙州老兒。只知淚出痛腸。不覺舌在口外。忽有人問壽山。萬法歸一。一歸何所。和聲便打。

結夏小參。不是心。不是佛。不是物。當機突出遼天鷲。非風動。非幡動。非心動。倚天長劍逼人寒。若是未舉先知。未言先領。棒未到折在那。更開粥飯相待。明窗下安排。按牛頭喫草。有甚活路。本覺今夏六十餘僧。十五軍州人事。人人眼寒湖海。个个氣壓乾坤。總是嫌佛不肯做底。何故。義出豐年。

舉。定上座問林際。如何是佛法大意。林際下禪床擒住。與一掌便花開定佇思。傍僧云。定上座何不禮拜。定禮拜大悟。師頌云。六十山藤恨未消。無端覷面觸聾頭。當機一著如風疾。佛法須教掃土休。

解夏小參。樵李雲閑。百越三吳。山青水碧。斗門浪靜。上載下載。北往南來。把定疊疊銀山。放行歌謠滿路。老缸子。三十年單明此事。一撓颺在朱涇跛。雲門一平生眼冷。諸方行脚。不離兜率。見角知牛。萬中無一。守株待兔。十个五双。今當自恣之辰。壽山解開布袋。盡情抖向諸人。諸人各自撿點家私看。良久。搆得十成。猶虧一半。

舉。瀉山一日方丈坐次。仰山從面前過。瀉云。若是百丈先師。子須喫痛棒始得。仰云。今日事作麼生。瀉云。合取兩片皮。仰云。此恩難報。瀉云。非子不才。老僧年邁。仰云。今日親見百丈師翁。瀉云。子向什麼句中見先師。仰云。不道見。只是無別。瀉云。始終作家。師拈云。一挨一撈。玉振金聲。一放一收。頭正尾正。則不無。若是大用現前。莫道仰山。瀉山也免不得。卓主丈。除夜小參。拈花未曾。萬象森羅悉皆微笑。覓心無處。山河大地早已平沉。可憐這邊那邊。東走西走。胡餅裏討汁。虛空中覓縫。殊不知自大年朝。弄到臘月三十日。都無虛棄工夫。總是自家受用。雖然如是。切忌坐在者裏。何故。今歲今朝盡。明年明日來。舉。荷澤見青原思和尚。思問。甚處來。澤云。曹溪來。思云。曹溪意旨如何。澤振身而立。思云。猶帶瓦礫在。澤云。者裏莫有真金與人麼。思云。設有。向什麼處著。師拈云。一人奢而不儉。一人儉而不奢。子細看來。未分真金瓦礫在。拈主丈卓云。者裏見得。瓦礫解放光。又卓云。者裏見得。黃金如糞土。靠柱杖云。可惜許。

告香普說

參禪學道。別無玄門要路。須是當人自悟始得。若端的一回悟去。見山不是山。見水不是水。然後見山是山。見水是水。若不悟去。見被見礙。為物所轉。為境所迷。所謂業識忙忙。無本可據。不見古德道。參禪須是悟。悟了須是遇人。若不遇人。盡是依草附木精靈。又道。參禪無別路。徹底須自悟。悟與未悟時。毫髮不差互。豈虛語哉。譬如諸子百家百工伎藝。亦各有悟門。若得悟去。自然脫白露淨。便有精妙之理。顏子坐忘。胃子曰唯。豈非脫白露淨。般投其斧。良捨其策。豈非精妙之理耶。吾宗如德山。負大經論。開大講席。為學者所宗。自註金剛疏鈔。聞南方有教外別傳之旨。憤憤悻悻。將所註底疏鈔。載之出蜀。擬欲去其窠穴。掃其種類。甚生氣宇。方到澧州。近龍潭寺。忽肚飢。見婆子賣油糍。遂買點心。婆云。首座所載者是什麼。鈎在不疑之地。山云。金剛疏鈔。一鈎便上。婆云。我有一問。若答得。不要錢喫油糍。若答不得。便去。遼天索價。山云。但問將來。真个相似。婆云。金剛經中道。過去心不可得。現在心不可得。未來心不可得。你點那個心。驅耕奪食。山無語。漏逗不少。婆云。你喫油糍未得在。第二下鐵槌來也。山云。此間莫有禪寺麼。婆云。近有龍潭老子。具大眼目。驅羊入屠門。山不得油糍喫。徑上龍潭。趨方丈。問云。久嚮龍潭。及乎到來。潭又不見。龍又不見。面目全露。龍潭背地裏答

云。子親到龍潭。據欵結案。山無語。中毒了也。山遂倒戈卸甲住了。一夜侍立龍潭。至更深出門。見外面黑。潭點紙燭度與之。山纔接。潭即吹滅。三寸七首用事。山當下大悟。一失人身。萬劫不復。山遂將所載底疏鈔焚之云。窮諸玄辯。似一毫致於太虛。竭世樞機。若一滴投於巨壑。古今榜樣。後住德山。拆却佛鈔。正令當行。只據一條棒。凡見僧入門便棒。慈悲似海深。岩頭雪峯。皆死棒下。一日雪峯辭德山。同岩頭到鰲山店中。岩頭一味打眠。雪峯一味坐不睡。岩頭云。何不瞳眠。似七村裏土地相似。他時異日。魔魅人家男女去在。生風起草。峯以手點霄云。我者裏未穩。一欵便招。岩云。我將謂是个漢。他後向孤峯頂上。結草庵去。猶作者个語話在。殺人不用刀。峯云。我實不敢自瞞。性命已在岩頭手裏。頭云。若據汝見處。一一通來。是則為你證據。不是為汝剗却。提上挈下。峯云。我初見鹽官舉色空義。有个人處。入之一字。也不消得。頭云。此去三十年後。切忌舉著。為人須為徹。又因洞山過水頌云。切忌從他覓。迢迢與我踈。驢前馬後。岩云。若如此。自救不了。殺人須見血。峯云。我請益德山。從上宗乘中。學人還有分也無。抱贓叫屈。山便棒云。道什麼。血滴滴地。當下如桶底脫相似。未敢相許。山云。我宗無語句。亦無一法與人。前箭猶輕後箭深。岩頭喝云。不見道。從門入者。不是家珍。迅雷不及掩耳。峯云。而今作麼生。求生不得生。求死不得死。頭云。你從今若欲播揚大教。一一從自己霄中流出。盖天盖地去。末後殷勤。峯跳下禪床云。今日始是鰲山成道。也是貧兒拾得錫。者个是從上參學底樣子。若無龍潭辨古今底眼目。不足為人之師。若非德山直下披襟去卻奉重底。不足為人弟子。又如岩頭之善琢磨。雪峯之不自瞞。深錐痛筍。令到不疑大安樂之地。方見其師友也。兄弟。既來此間道集。今日告香請普說。告香乃前輩為新掛搭兄弟之設。從上參學。纔到一所在。須是先請益因緣。方許入室。後來見人多了索性。夏前告香。普同請益一次。諸兄弟從今而後。若做工夫。但向自己行住坐臥處參究。參來參去。參到無參之處。因地一聲。便見德山雪峯性命。在諸人手裏。不特二大老。從上諸佛諸祖性命。亦在掌握中。到者裏。十二時中。自然得力。生死岸頭。亦乃得力。觸境遇緣。不為物轉。上人門戶。勘辨諸方。著著有出身之路。不坐在是非得失窠臼中。至於一大藏教。一千七百公案。語言文字。精妙之理。一點著不得。雖然。著不得處。事事著得。何故。地靈步步雪山草。僧寶人人滄海珠。久立珍重。

秉拂

徑山結夏。聲前旨。向上機。石火莫及。電光罔追。二千年前。黃面老漢道个圓覺伽藍。平等性智。將四聖六凡。情與無情。一禁禁住。錯。二千年中。列祖出興。將錯就錯。於其中間。晝食夜寢。開[人/米/田]種粟。三百五百。東說西話。用盡自己心。笑破他人人口。錯。二千年後。徑山堂上。坐致太平。人人鼻直眼橫。个个保疆守界。行看五峯雲。坐聽雙澗水。透頂透底。無是不是。錯。只如山上有鯉魚。井裏有蓬塵。又作麼生。錯錯。當機拗折驪龍角。舉芭蕉主丈子話。弁鬘泉雅白雲頌。師頌云。與奪之機覲面提。拄天拄地峭巍巍。觸體一擊百雜碎。狼藉春風無盡時。解夏。諸佛祕印。破糞箕秃苔蒂。列祖玄關。瀾泥團鐵門限。與麼提持。與麼顯露。鷹睛鶻服。窺覷無門。進前則邇上險絕。退後則徹下孤危。九十日內。四世界中。風颯颯地。誰敢違條犯令。豎起拂子云。看看。印文露沈。擊拂云。裂破玄關。倒用橫拈。無施不可。萬里無寸草處。丟躍出焦尾大虫。出門便是草。帶角毒蛇當路臥。正恁麼時。九夏賞勞。誰是得者。喝。舉。灌溪初參臨濟。纔跨門。濟驀胷擒生。溪云。領領。濟便托開。應庵和尚拈云。灌溪氣宇如王。被臨濟活埋。在鎮州十字街頭。當時若是光孝。棒折也未放他在。何故。家肥生孝子。國霸有謀臣。方丈拈云。動絃別曲。葉落知秋。則不無灌溪。若使臨濟更具些子慈悲。免其前不構村。後不迭店。應庵云。棒折也未放他在。誠哉。師拈云。臨濟如猛虎。當途遇物則噬。可惜灌溪性命。斃於爪牙之下。當時若善倒捋其鬚。非特托開未得。亦免遭人檢責。雖然如是。那裏是臨濟不具些子慈悲處。虎班易見。人斑難見。

偈頌

血書蓮經

眼底有筋皮有血。自家針筍自家知。一毫頭上能通變。紅菡萏花三四枝。

天衣悟道井

雲根鑿斷碧沉沉。取苦天衣喫賺深。泥水通身無雪處。月明鴈影落波心。

南叟號

蒲口蠻音滅正傳。盡閻浮界是兒孫。文殊指點不能到。連累善財曾倒跟。

寄呈靈隱石谿和尚

照雪全提生殺令。親曾拶向死邊過。而今割地思量著。無奈寒毛卓豎何。

枯體擔人我擔

一物百駭無子異。負他自負幾時休。只今放下便放下。一擔何曾有兩顛頭。

悼双杉和尚

海湧波騰鈿化龍。不須惆悵碧潭空。松窗月冷尋思去。枯木猶吟半夜風。

石鏡號

一著當機聳斷崖。明明非像亦非臺。看來著去都頑了。羞見娘生面目來。

不傳號

碎除竺國冬瓜印。掃盡真丹剗子禪。一一胸襟流出底。正宗滅却瞎驢邊。

徑山火後重開大慧語

板共八百有零片。字計三千餘萬言。石火光中看得破。奚翁三寸舌猶存。

牧坡號(蘇省元取牧羊之義)

漢節親持入虜庭。羝羊眠處草深深。至今平地成堆阜。渾是孤忠一片心。

送慧居士

瞿曇天子本同參。有口從來各自緘。剗地臨歧成漏泄。你儂長揖我和南。

送無機小師明兄

未展炊巾便托開。却令坐地喫茶盃。十分禮意慙惹了。為汝遭爺教壞來。

贈陳梅坡說史

版圖盡復喜時平。誰挽天河洗甲兵。好說放牛歸馬事。熙熙四海樂樵耕。

書華嚴經

二千年事已模糊。白紙拈來黑字書。泄盡南詢些子意。始終成敗是文殊。

讚佛祖

坐岩石大士

蒼崖參萬仞。瀑布[泳-永+]千尋。几坐磐陀石。慈悲似海深。

魚籃

雲鬢亂垂垂。風姿有如許。著意在錦鱗。蹉過全提處。

草衣文殊普

髮垂肩衣紉草。持如意明什麼。稽首七佛師。毗耶遭靠倒。行願海深無底。手中經明舉似。瓶瀉二千酬。墮在草[竺-二+果]裏。

夾山見缸子

大德住何寺。漫天設網羅。點頭三下處。猶欠幾缸篙。

香巖聞擊竹

一礫千鈞重。當陽為發機。觸體轟破後。遺恨竹依依。

朝陽

目前機通一線。貴完全無漏綻。指[目*雇]靈寒。通身白汗。

對月

手中底貝多葉。流通分曾未徹。呼顧兔熱。字黑紙白。

寒山(執掃帚)

不是我同流。拔本得索性。此人若行時。奪汝苕帚柄。

拾得(執經卷)

問姓姓不知。問名名不識。全提一卷經。何似叉手立。

五祖送六祖渡江

只是長行一碓夫。踏翻窠臼命如絲。扁舟一夜撐明月。養子方知是父慈。

缸子

靠却蘭橈坐。寥寥双眼空。冷看紅蓼岸。意在碧潭龍。

巖陽

一物不將來。全肩擔荷去。者些毒害心。寧可是猛虎。

小佛事

真大師起骨歸泉州

聲色純真。見聞不礙。道得即住。略露半提。拂袖便行。猶欠一解。咩咩。靈山門下。未著你在。

延淨頭起骨

東司頭。延壽裏。淨地上放屙。髑髏前已見。便恁麼去。未有地頭。畢竟如何。家住東州。

義藏主火(曾在徑山維那)

豎火把云。此義幽深。無人能到。親曾法戰。千七百人。總聽全提。酬問字僧。一大藏教。不消一唾。擡省雲岩岩上雲。珊瑚枝枝日旦旦。義藏主見麼。不得喚作火。

永上人鎖龕

□人。這一捏渾是鐵。死却見行。一得永得。門掩清風□□閑。紛紛花雨空狼籍。

遵書記入塔

用黃龍一機。遵七佛儀式。一點不加文。通身赤骨力。天何高。地何極。鐵壁銀山。從者裏入。

補陀吉西堂奠茶

某人東礪靈苗。叢林本色。玉几峯前。分座提持。補陀岩畔。雲濤翻雪。蕩盡諸方五味禪。換却衲僧三才舌。別別。喫茶。珍重。歇。

自明書記火(暫到死)

某人自明而誠。自誠而明。夫子命脉。楊岐眼睛。恁麼會去。萬里客程。只今併卻唇吻。速道速道。擲下火把云。丙丁童子來求火。

志典座火

其志可尚。其趣亦可尚。解道生薑不解辣。又言黑豆好合醬。瞥轉一機。口耳俱喪。作麼生。諸方活埋。這裏火葬。

空海寶西堂炬

睡虎機前。龍困深處。碎破砂盆。折黑竹篋。此是空海具行脚遍參底眼目。南屏峯下。正受堂前。據南泉位。擔睦州板。此是空海分座提綱底機用。燄烹金爐。用□晴法。示眾生病。卷毗耶舌。又是空海入廬垂手□□□。只如攢簇不得底病。正覓起處不得。空海如何理論。擲下火把云。肝膽此時俱裂破。如水與水火與火。

為沙彌落髮付衣

頂[寧*頁]一機。分明說破。未動蜂銚。鬚髮自墮。佛佛授手。祖祖相傳。線蹊不露。塔在左肩。

跋謙首座書松源師翁普說後

病多諳藥性。經効始傳方。松源師翁。侍應庵師祖於鐘山。得此經効之方。普施而瘳眾疾。遜翁謙首座。選對洽而筆之。暴白愈甚。所謂呪咀諸毒藥。還著於本人。切宜謹之。
雲谷和尚語錄卷下(終)

No. 1454-A

南堂說法。或誦貫休山居詩。或歌柳耆卿詞。謂之不是禪可乎。近世尚奇怪生矯。苟見處不逮古人。如優場演史。談劉項相似事。便體之者忘倦。其奚非真史也。若有所見。雖無此錄。誰無此錄。既無所見。雖有此錄。誰有此錄。或曰。子論太高。天下無語錄矣。雲谷望土。安可使之無傳。余拱手謝曰。善。善。善。戊辰九月朔日書。

[CBETA 贊助資訊](#)

[.https://www.cbeta.org/donation/index.php](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
